



STINAPA TA INFORMA

HEPA ! KIKO TA BULA EINAN?

E kos agradabel di skirbimentu di e artíkulo pa e kampaña “NOS TA BIBA DI NATURALESA” ta ku bo mes ta siña hopi. Pa bo skirbi bon, bo mester investigá basta i m’a papia ku hende ku sa hopi di e tópikonan. Ora mi kore rònt awor mi ta ripará hopi mas ku ántes. Tuma por ehèmpel e artíkulonon ku m’a skirbi tokante replantashon. Awor mi sa ki importansha e palunan krioyo tin. Ku e buki ‘Nos Matanan’ den mi man, mi ta kore rònt awor purbando di rekonosé tur palu i mata krioyo. Mi ta haña leuk pa sa awor ku e palunan ku semper mi a atmirá nan tronkon bunita, yama ‘Palu di Sia Kòrá’ Pero tin un otro banda di e medaya. Awor por ehèmpel mi sa tambe kuantu daño kabritunan ku ta kana lòs ta kousa. Ta tristu pa realisá ku e motibu ku kasi no tin mas palu krioyo ta ku ta kabritu a kome tur ora nan ta chikitu. Anto siendo ku tin lei ku ta prohibí pa kabritu kana lòs. Mester hasi algu ! Pa mi artíkulonon tokante replantashon mi a investigá e tópiko intensamente. Meskos a pasa ku mi siguiente tópiko; raton dj’anochi. Palu bo no por hera den un paisahe, pero raton dj’anochi sí t’un otro historia. Nunka mi a mira nan, òf en todo kaso, esei mi a kere. Pero mi tabata robes. Pasobra e animalnan ku mi sa mira bula dor di mi kas no ta para ètòl. T’esei semper m’a pensa. Pero ta raton dj’anochi. Ántes m’a yega di wak nan na Blijdorp, e dierentuin di Rotterdam. Bo por a kana den nan oula anto diripiente nan ta bula pasa serka di bo kabes, lagando bo kurpa kue rel. Tabata bestia straño tambe. Nan ta parse un sorto di raton òf hamster ku hala. Pero grásias na Fernando Simal, gerente di Parke Nashonal Washington Slagbaai, ku a splika mi masha hopi kos di e raton dj’anochi, mi sa awor ku nan ta e úniko mamífero (bestia ku ta pari yu bibu i ta produsí lechi pa nan) na Boneiru. Pero tambe mi sa awor ku e animalitonan aki ta indispensabel pa nos sistema ekológiko, meskos ku e palunan krioyo. Fuera di esei, pa hende nan tin e bentaha plasentero ku nan ta kome por lo ménos 500 muskita tur anochi! Sin raton dj’anochi Boneiru lo ta pèstá ku muskita. No ta importá ku ta palu òf raton dj’anochi, pa nan tur dos ta kontá; “NOS TA BIBA DI NATURALESA”
Skirbí pa Trix van Bennekom, tradusí pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru